

大明會典

大明會典卷之三十三

戶部二十

課程二

鹽法二

福建

福建都轉運鹽使司

洪武初置

上里場鹽課司

海口場鹽課司

浯州場鹽課司

牛田場鹽課司

惠安場鹽課司

涵州場鹽課司

浚美場鹽課司

鹽課數目

洪武間歲辦

鹽場七處。歲辦鹽一十萬四千五百七十二引三百斤零。

弘治間歲辦

每歲辦大引鹽一十萬五千三百四十二引。百六十五斤八兩九錢。內本色鹽四萬七千四百五十六引二百七十八斤四兩九錢。折色鹽五萬七千八百八十三引三百八十七斤四兩。

萬曆六年歲辦

大引鹽二十萬四千三百四十引二百六十四斤

歲解太倉銀三萬二千二百兩一錢泉州軍餉銀二千三百四十四兩二錢

行鹽地方

福州府

興化府

泉州府

汀州府

漳州府

邵武府

建寧府

延平府

正統十三年奏准將潯、涵、浯、浼三場鹽課共五萬

六千八百八十三引俱准全折。每引折米一斗。  
派納泉州府附近永寧衛并福全金門等所倉  
聽給官軍月糧。○弘治十六年題准。將惠安場  
鹽七千三百五十二引。每引徵銀七分解部。各  
場竈戶濱海諳煎曬者。陸續輸官。其依山不諳  
者。官為收買。付總催給散。諳煎者代納鹽斤。○  
正德四年議准。該省報曾人少。今後依山價銀  
不必支商。將附海本色逐年變賣解部。○十一  
年。今依山鹽課如遇商人報中。每一小引折銀  
一錢二分五釐。與附海本色鹽課相兼支給。○

十二年題准將上里海口牛田三場附海鹽課  
六千六百五十引餘每一引折二小引每引二  
百斤就於本處召商照例每引納銀三錢解部  
○又題准附海鹽課不必遠方開中。就於本省  
召商中賣○十四年令福建鹽場商人中到引  
鹽以十分為率五分派與福興泉漳四府一州  
五分派與延建邵汀四府各地方行賣○嘉靖  
九年奏准將潯美場鹽課米每石折銀五錢加  
耗修倉銀三分追解泉州貯庫支放○十年題  
准福建官鹽仍以二百五十斤為一引每引一道

照包正鹽一引并割出餘鹽若干。不必給以小

票。每包許帶餘鹽二引。正鹽照原價三錢。餘鹽

定價四錢。○十三年題准福建運司引鹽照舊

例。每引二百斤為一袋。帶耗五斤。不許以進貢

修城等項名色濫加耗鹽四十五斤。其正鹽一

引止許帶餘鹽二引。不許給與小票。縱令多帶

○十九年題准涪州。沔州。二場鹽米每石俱折

銀五錢。○萬曆二年。設運判一員。駐劄黃崎分

司。將黃崎分司運副移駐水口。運同移駐泉州。

專督理泉漳二府鹽務。給票抽稅。每鹽三千斤

定稅一錢五分。潯浯兩惠四場除竈戶原曬鹽場不課。其新漲海灘民間開墾者通行計坵徵課。惠安場歲徵課銀。仍舊解部。其潯浯兩每引復加二分與給票抽稅。及漳浦詔安等縣潯浯等場新設坵稅俱作該省常餉。待海上撤兵起解濟邊。○三年題准將上里海口牛田附海本色每引納銀三錢。差官解部。○八年裁革福建添設運判一員。同知仍駐水口。副使駐劄黃崎。各分司管理鹽法。

河東都轉運鹽使司

洪武二年置

解鹽東場分司

解鹽西場分司

解鹽中場分司

弘治二年增置

鹽課數目

洪武間歲辦

歲辦鹽六千八十萬斤

弘治間歲辦

每歲辦鹽四十二萬引。內常股鹽二十九萬

四千引。存積鹽二十二萬六千引

萬曆六年歲辦

小引鹽六十二萬引

歲解太倉銀四千三百九十五兩九錢宣府  
鎮銀七萬六千七百七十八兩五錢六分大

同

代府祿糧銀四萬三千一百十三兩山西布政司  
抵補民糧銀七萬四千二百五十九兩

行鹽地方

西安府

漢中府

延安府

陸慶四年改食池鹽

鳳翔府

歸德府

懷慶府

河南府

汝寧府

南陽府

嘉靖二十七年議准。惟汝州并所屬四縣。行本司鹽。其餘十三州縣。兼行本司并准北鹽。

汝州

平陽府

潞安府

澤州

沁州

遼州

成化十年。修築河東鹽池垣牆。置東門以為出入。設解鹽東場分司於安邑縣路村。地界撈辦東場鹽課。設解鹽西場分司於解州撈辦西場。

鹽課。每歲運司輪委佐貳官一員各領該分司印信駐彼量帶官攬秤斗及提督巡檢司官兵人等巡視。兼捕獲鹽徒修理牆垣○二十三年增河東歲辦鹽課一十一萬六千引共為四十二萬引○弘治二年奏准添設解鹽中場分司并給印信○正德八年題准將本運司鹽課額辦四十二萬引外另撈二十萬引召商於偏頭等關中納糧草將原派倉場糧草照數扣除以補拖欠祿糧之數○又奏准河東運司將見在引目不拘年分挨次領給欠少鹽課從宜帶撈

補完其每年額辦鹽課未開中者除該解宣府年例銀八萬兩外餘剩鹽候補足各年商人所中之數方許另開仍行山西陝西今後不許指以戶鹽名目不候戶部奏有明文輒便開中如違聽本部并巡鹽御史奏治○嘉靖十年令河東巡鹽御史變賣在場新舊鹽課補還借欠戶部及拖欠宣府年例并山西布政司易換民糧之數每引定價四錢不許倡為餘鹽之說朦朧奏討○二十七年議准河東運司正鹽四十二萬引該銀一十三萬四千四百兩除解宣府年

例八萬兩外剩餘五萬四千四百兩并餘鹽五十萬引折銀六萬四千兩共銀一十一萬八千四百兩內除四萬三千一百一十六兩八錢徑解大同府補給

代府祿糧其餘七萬五千二百八十三兩二錢俱解布政司抵補民糧及通融處補祿糧各

王府不得另行奏討徑自支取○三十一年議准河東鹽法引目增入太原六同字樣行令二府一例行鹽併行巡鹽御史將

王府三司食鹽查照彼中鹽價定與折色於贓罰

銀內解送不許仍前撥給本色滋生弊端○三十二年題准河東鹽引革去餘鹽名目定以六十二萬為額除宣大二鎮及各項食鹽照舊起解其餘撥補先年額欠消折等鹽所中銀兩一體解部聽解宣大山西專備主客兵年例支用○運司文冊正餘鹽通行歸併○隆慶四年令河南南陽府所屬鄧唐十二州縣改鑄銅版仍屬河東行鹽地方○又令山西太原府所屬陽曲等十州縣并汾州及所屬三縣共十四州縣以後通食票鹽每票抽稅銀六分青令屯鹽道督

理完解運司，每年終巡鹽御史題解戶部濟邊其關防稽考之法，悉照鹽法則例舉行。其原派陽曲等十四州縣引目，准令均攤河東運司行鹽地方。○又奏准河東鹽運司開墾解州陸小等池，照太汾事例印給小票發賣，其撈辦入官鹽課當校三年內實收之數酌為定額，接補東池額欠有餘一併補給大同，并布政司年例之數。仍令運司各官遵照舊制，運副駐劄安邑，專管東場，運同駐劄池南，專管南場，運判駐劄解州，專管西場各鹽。該州掌印官協理女鹽等池。

北岸中場責令運使帶領分守河東道移駐解州。監理東西兩池事務。將該道原領

勅書添載監理解州鹽法字樣換給。巡鹽御史亦

照長蘆兩淮巡鹽并陝西巡茶事例。就便巡歷

該管行鹽地方。續以設立南場不便尋罷○又議准河東運

司將延安府地方改食池鹽。邠永。汧。隴。麟。遊。五

處仍食解鹽

陝西

靈州鹽課司 洪武二年置

漳縣鹽井

西和縣鹽井

鹽課數目

洪武間歲辦

西和縣歲辦鹽一十三萬一千五百三十斤

零

漳縣歲辦鹽五十一萬五千六百七十斤零

靈州歲辦鹽二百八十六萬七千四百七斤

弘治間歲辦

靈州西和縣漳縣歲辦鹽共三百五十一萬

四千六百七斤零

萬曆六年歲辦

鹽一千二百五十七萬七千六百六十八斤  
歲解寧夏鎮年例銀二萬三千二百四十二  
兩延綏鎮年例銀二萬三千七百一十四兩  
二錢四分固原鎮客兵銀二千五十九兩固  
原軍門犒賞銀七千一百二十兩四錢四分

行鹽地方

鞏昌府

臨洮府

河州

延安府

舊行河東鹽。隆慶四年改屬

正統三年議准將靈州官鹽召人中納寧夏馬  
匹凡上馬一匹鹽一百引中馬一匹鹽八十引

送總兵官收用○成化二十三年移萌城批驗所於紅德城堡冷黑城乾溝二路鹽車俱抵慶陽府城市關廂卸載商人同卸載店主齋執引目赴府驗過赴行鹽地方貨賣畢引目付店主銷繳○弘治二年令靈州鹽課司行鹽地方仍舊於平涼靜寧隆德政平慶陽環縣等處○九年題准將靈州引鹽止收銀給軍自行買馬每引一百道折價銀一十五兩○十五年題准一池鹽引每引增定價銀四錢五分載鹽六石東路鹽價發慶陽府西路鹽價發固原州各收貯

分解各邊買馬○正德元年奏准靈州大池每年增課一萬五千引并舊課二萬六千二百三十二引小池增三萬引并舊三萬三千一百五十引共五萬九千三百八十二引每引納銀二錢五分照鹽一車以六石為則運至鹽場卸所仍收卧引銀一錢共銀三錢五分俱送慶陽固原官庫收貯買馬○十二年令革去卧引錢及車戶上納門鹽等項慶陽固原各給批一張或三十二引填註行鹽地方各赴兵備掛號立限截角按季解繳○嘉靖八年議准大池增三

萬三千六百二十六引。小池增二萬二千四百一十七引。每引二錢五分。卽引銀一錢。共一萬九千六百一十五兩。送平涼府收貯。專備祿糧。

○十四年題准靈州小鹽池額鹽三千一百零五引。專供花馬池一帶修邊支用。其加增鹽三萬引。召商開中三邊。輪流買馬。或接濟軍餉支用。如遇虜賊臨邊。車脚阻礙。照舊停止。○三十四年奏准陝西行鹽地方。每鹽二百斤為一引。每引收銀四錢五分。每十引西鹽二分。搭配漳鹽八分。一切掛號截角支放。禁約巡緝事宜俱

聽分守隴右道監理。其收貯銀兩於年終解送花馬池管糧衙門交收。專備防秋兵馬支用。○三十五年題准。將二池鹽每引定價四錢。鹽八石。額課新增三七掣支。餘鹽銀二錢五分收納。○隆慶元年題准。將大小二池納價餘鹽等銀五錢二分。以四錢作引價。一錢二分作引。商人上納淮浙鹽一千引。准配池鹽一百引。小池鹽于西路發賣者。仍照舊例納斗底銀一錢五分。解固原州。聽軍門犒賞。其餘引價。解慶陽府。聽延寧二鎮客兵支用。○又議准。西和縣原開

鹽井一眼漳縣舊開鹽井四眼。又有新井。各商獲利爭報。令每百斤納銀二錢九分。○四年題准。將西漳二縣課銀每年二千餘兩。改解蘭州收貯。專備臨鞏兵備。固原二道客兵支用。○五年題准。花馬池大小二池。鹽每引照鹽八石。四倍河東。令各商報納。每引增銀一錢二分。共五錢二分。其卧引銀一錢二分。西路斗底銀一錢五分。共增課銀七千有奇。○萬曆五年題准。將定邊道庫貯鹽大池者解延綏。小池者解寧夏。其新增延安府課銀三千二百二十一兩。原議

解河東運司就近改解延綏。即將該鎮應發主  
兵銀扣荷宣府抵河東額課。

廣東

廣東鹽課提舉司

洪武初置

小江場鹽課司

右橋場鹽課司

東莞場鹽課司

招收場鹽課司

靖康場鹽課司

姓峒場鹽課司

隆井場鹽課司

淡水場鹽課司

雙恩場鹽課司

鹹水場鹽課司

歸德場鹽課司

海晏場鹽課司

香山場鹽課司

黃田場鹽課司

海北鹽課提舉司

洪武二年置

博茂場鹽課司

新安場鹽課司

武邱場鹽課司

茂暉場鹽課司

白石場鹽課司

白沙場鹽課司

臨川場鹽課司

東海場鹽課司

大小英感恩場鹽課司

三村馬表場鹽課司

官寨丹兜場鹽課司

博頓蘭營場鹽課司

西鹽白皮場鹽課司

蠶村調樓場鹽課司

陳村樂會場鹽課司

鹽課數目

洪武間歲辦

廣東鹽場一十四處歲辦鹽四萬六千八百

五十五引一百斤零

海北鹽場一十五處歲辦鹽二萬七千四十

引二百斤零

弘治間歲辦

廣東與洪武間舊額同

海北歲辦鹽一萬九千四百八十三引四百九十斤。內本色鹽一萬三千三百八十引一百斤。折色鹽六千一百三引九十斤

萬曆六年歲辦

廣東小引生鹽三萬二千二十九引。小引熟鹽三萬四千六百一引

海北小引正耗鹽一萬二千四百八十六引。歲解太倉銀一萬一千一百七十八兩。存留本處備用銀四千七百九十兩九錢四分

行鹽地方

廣東

廣州府

肇慶府

惠州府

韶州府

南雄府

潮州府

南安府

此下三府行  
准鹽後改

贛州府

吉安府

海北

雷州府

高州府

廉州府

瓊州府

永州府

柳州府

桂陽州

桂林府

柳州府

梧州府

潯州府

慶遠府

南寧府

平樂府

太平府

思明府

鎮安府

田州

龍州

泗城州

奉議州

利州

正統七年奏准廣東海北提舉司所屬臨川等

六場鹽課每一大引折米一石。運赴府倉聽支衛所官軍俸糧。○景泰五年。令廣東海北二鹽課司。竈丁有私煎餘鹽者。送本司。每引官給米四斗。○正德五年。奏准廣東鹽商引目。通收在官。候下場載鹽給發。酌量地方遠近。定與限期。俱以載鹽出場為始。廣惠二府限三箇月。肇慶韶州二府限四箇月。南雄梧州二府限六箇月。高廉等府限八箇月。廣西湖廣衡水二府。江西南贛二府限十箇月。以裏。各將引目。赴巡鹽御史銷繳。違限者。坐以故將舊引影射私鹽罪。○

又題准靖康等二十三場照量鹽場土熟貴賤  
和中徵價熟鹽場分有徵每一引徵銀二錢  
三分無徵收銀一錢生鹽場分有徵每一引  
徵銀一錢七分無徵亦收銀一錢責令各官攢  
照數徵完解提舉司○嘉靖三年議准廣西梧  
州府所貯鹽利銀每年動支一萬五千兩解本  
司預備軍餉有餘通融給散

王府祿米及官軍人等俸糧○隆慶四年題准舊  
例凡行鹽地方各立鹽場廣西則梧州廣東則  
肇慶南雄清遠商人投稅者每正鹽一引收銀

五分餘鹽每引收銀一錢後每正引一道准照餘鹽四引納軍餉銀四錢五分後又准照餘鹽六引納銀六錢五分再有夾帶謂之自首每引抽銀二錢商價通融足支兵餉令該省巡撫查理疏通有勢豪阻撓奸商作弊參奏處治○萬曆二年題准廣西雇募水手人夫改造中船赴廣東買鹽仍添設梧州鹽運司副提舉二員常輪一員齎銀督船往來管理公私諸費悉如商販之例買完運梧州候桂林船到轉發○八年題准廣西每年于廣東運鹽五萬四千四百五

十四包。每包用工價銀四錢一分九釐。湖廣衡  
永二府價銀隨時高下。每發官鹽一包。許搭商  
鹽一包同賣。一歲一運。可得鹽利銀一萬五千  
餘兩。著為定例。

四川

四川鹽課提舉司 洪武初置

廣福等三井鹽課司

僊泉井鹽課司

郁山井鹽課司  
涂甘井鹽課司

華池等三井鹽課司

通海等三井鹽課司

永通等七井鹽課司

羅泉等五井鹽課司

黃市等二井鹽課司

上流等九井鹽課司

大寧縣大寧場鹽課司

福興等六井鹽課司

新羅等二井鹽課司

雲安場等五井鹽課司

富義等十三井鹽課司

鹽井衛

黑鹽井鹽課司

白鹽井鹽課司

鹽課數目

洪武間歲辦

上流等九井鹽課司歲辦鹽一百九十一萬九千五百七十七斤零

永通等七井鹽課司歲辦鹽八十四萬四千七百七十斤

郁山井鹽課司歲辦鹽二十二萬六千八百斤

涂甘井鹽課司歲辦鹽一十六萬四千二百斤零

雲安場等五井鹽課司歲辦鹽二百一十二萬四千六百二十斤

通海等三井鹽課司歲辦鹽二十四萬四千三百三十斤零

福興等六井鹽課司歲辦鹽四十九萬七千七百七十斤

廣福等三井鹽課司歲辦鹽二十二萬四千四百七十斤零

華池等三井鹽課司歲辦鹽二十二萬四千二百二十斤

新羅等二井鹽課司歲辦鹽七十二萬五千五百斤

富義等一十三井鹽課司歲辦鹽一百八十八萬八千斤

羅泉等五井鹽課司歲辦鹽三十二萬一千三百斤零

黃市等二井鹽課司歲辦鹽六十九萬四千  
斤

儂泉井鹽課司歲辦鹽三萬八千八百五十八斤

弘治間歲辦

上流等井鹽課司歲辦鹽二百七十九萬四千四十五斤零

永通等井鹽課司歲辦鹽二百六十一萬八千八百四十一斤零

郁山井鹽課司歲辦鹽七十三萬二千三百八十八斤零

涂甘井鹽課司歲辦鹽二十八萬七千八百

一十五斤

雲安場等并鹽課司歲辦鹽二百四十九萬  
八千四百九十一斤零

通海等并鹽課司歲辦鹽九十二萬一千三  
百三十斤零

廣福等并鹽課司歲辦鹽五十五萬六千三  
百二十五斤

華池等并鹽課司歲辦鹽六十三萬四千五  
百三十二斤零

新羅等并鹽課司歲辦鹽九十九萬五千八

百七十八斤零

富義等井鹽課司歲辦鹽三百六十七萬九千二百七十二斤零

羅泉等井鹽課司歲辦鹽一百二十四萬四千一百二十七斤零

黃市等井鹽課司歲辦鹽一百七萬五千六百一十斤零

僊泉井鹽課司歲辦鹽二百一十三萬七千六百一十五斤零

福興等井鹽課司見辦如舊額

萬曆六年歲辦

鹽九百八十六萬一千一百四十斤

歲解陝西鎮鹽課銀七萬一千四百六十四兩

行鹽地方

成都府

敘州府

順慶府

保寧府

夔州府

潼川州

嘉定州

雅州

景泰四年令四川鹽課提舉司於每年三月以

前具上中下三等鹽課司并商名引鹽數目。挨次挨號扣課均派開報布按二司并巡鹽官處定於三月初一日會同照引唱名給散以引目連各商通帖散帖封發各鹽課司收貯分派各井逐月支鹽隨時批訖退引給付各商限次年三月終送提舉司類總轉造布按二司并巡鹽官比對相同照數完造歲報若遇急用邊糧開中務亦先年出榜次年三月唱名支鹽○正德元年奏准四川大寧課少場分不拘年月支近俱徵銀二兩其餘井場定立上中下三等年分

遠近亦作二等。弘治十五年至十八年未開中者每引上場徵銀一兩五錢。中場一兩二錢。下場九錢。弘治十四年以前未開中者上場徵銀一兩二錢。中場一兩。下場六錢。商人有願為代納。陸續支鹽者。照井場年分就於數內每錢減去三分。以作商人之利。竈戶還鹽或銀不許過所定之數。商人亦不得自行選擇。其有乾淡坍塌等項。許以私開小井。幫補煎辦。不再徵課。○四年奏准。四川大寧場竈丁。止令辦納原課。其逃民私煎加增之數。另行召人。并各竈餘丁頂

補母致負累人難○嘉靖四年議准將四川鹽井衛實在旗軍一千二百名分為四班二年一換每班撥軍三百名同民竈五十名各與官房住坐日逐煎辦鹽斤聽其自行貿易以為衣糧之資每軍該支月糧扣留在倉准前項鹽課各軍有事仍聽調用拘各餘丁更替煎燒無事隨班操練其民竈該納鹽課仍舊收倉每年給作合衛官員折俸鈔貫并旗軍三等入戶九月醃菜鹽斤止委指揮一員管領煎辦○十年題准四川大軍安雲等一十五場額辦鹽課俱照弘

治十五年則例徵銀存留本省以備接濟松  
運糧脚價之費。每年按季徵收。與秋糧一體起  
解。其小民邊糧本色止徵正米價銀。不許重派  
脚價。○三十七年議准四川鹽課從引定銀。太  
寧等場照舊每引折銀二兩。雲安等一十四場  
每引折銀七錢五分。四釐三毫五絲。綿州等三  
十四州縣。子井漸添量為增額。仁壽等九縣。丁  
井亡耗。量為減額。簡州一十六州縣。子井額課  
照舊。通計五十七州縣一所一場。共鹽八萬九  
千二百六十三引一斤。實徵銀六萬九千一百

七十二兩四分六釐尚少額鹽三千三十九引  
一百一十九斤。該銀二千二百九十一兩九錢  
五分四釐。查有布政司歲收商鹽小票稅銀抵  
補。候查新井新丁。照額派補。其閏課原非部額  
逋負尚多。各場暫免派徵。所少

王府食鹽亦於鹽稅銀內支補。其有餘剩與正課  
一同解部。○隆慶二年題准許竈丁多開小井  
以補塌井。逃丁之數不必加增。其保寧重慶嘉  
潼等處。遠商人赴提舉司告給小票不便。亦  
令增加引票酌定張數。分發五府州縣就近告

給

雲南

黑鹽井鹽課提舉司

洪武十五年置

黑鹽井鹽課司

阿陋猴井鹽課司

琅井鹽課司

白鹽井鹽課提舉司

白鹽井鹽課司

安寧鹽井鹽課提舉司

安寧鹽井鹽課司

五井鹽課提舉司

諾鄧鹽井鹽課司

山井鹽井鹽課司 師井鹽課司

大井鹽井鹽課司

順盪鹽井鹽課司

鶴慶軍民府劍川州彌沙井鹽課司

麗江軍民府蘭州井鹽課司

武定軍民府和曲州只舊井河頭井草起

河尾井

鹽課數目

洪武間歲辦

五井鹽課提舉司歲辦鹽二十七萬二千一

百三十七斤零又析綿布七百二十段

布每段長

一丈一尺闊八寸

黑鹽井鹽課提舉司歲辦鹽五十七萬二千三百四十斤零

安寧鹽井鹽課提舉司歲辦鹽七十七萬二千六百八十斤零

白鹽井鹽課提舉司歲辦鹽二十一萬七千二百二十斤零

弘治間歲辦

五井鹽課司

安寧井鹽課司

以上二司歲辦無定數

黑鹽井鹽課司歲辦鹽六十一萬六千三百七十斤

白鹽井鹽課司歲辦鹽三十三萬四千三百一十四斤

萬曆六年歲辦

鹽一百八十二萬七千八百七十七斤。五井提舉司綿布每段折銀四分五釐

歲解太倉鹽課銀三萬五千五百四十七兩

三錢七分。遇閏該銀三萬八千五百二十八兩九錢七分。

行鹽地方

本省十二府各州縣

正統九年。令雲南各鹽課司。每竈戶添撥餘丁二人。免其差役。專一採薪煎鹽。鹽課不許擅除。

○正德八年。議准雲南安寧鹽井鹽課提舉司折色課銀。每引徵銀九錢。貯庫以備邊軍支用。

○嘉靖八年。題准雲南鹽引合置流通簿一本。每年差人赴部齎領。仍赴南京戶部印編。歲額

無閏五萬六千九百六十五引。召商開中。巡撫酌量井鹽。美惡定擬價銀。收布政司。聽戶部支用。以後倒換文簿。并印編引。目率以為常。一切批文小票。悉革不用。○三十三年題准。將黑白安五彌沙蘭州舊河尾等井鹽課革去。成色虛數盡折紋銀。其五井提舉司額辦布。原解大理府搭放官吏俸鈔。今將折俸另處補給。其漂布每段折銀四分五釐。每銀一兩折鹽一引。俱作正課。及續增新增加辦。加閏復開河頭等井。每歲共該銀四萬三千三百三十四兩六錢零。

無閏。止該銀四萬五兩六錢零。著為定額。○三十五年題准。將雲南安寧井原額引鹽摘發。琅井帶辦八十七窰鹽。每引折銀七錢三分。輪撥三十六窰。每窰每月領油二百一十桶。折納銀一兩六錢八分零。安寧井實在鹽每引減折徵銀四錢五分。順鹽井給商本色鹽。每引徵銀八錢。備邊折色鹽。每引徵銀一兩。實徵鹽課無閏。該鹽四萬七千三百八十二引一百四十九斤一十四兩九錢。共銀三萬五千七百十九兩一錢三分零。通閏。該鹽五萬一千三百三十一引。

六十二斤六兩零。共銀三萬八千七百六十兩  
七錢零。俱解太倉。其山井并新開石門關三井  
鹽課本提舉司照舊徵納

大明會典卷之三十四

戶部二十一

課程五

鹽法三

鹽法通例

凡歲辦額鹽。洪武初定兩淮歲辦鹽數。每引四百斤。官給工本米一石。兩浙如之。後分一引為二引。而以四百斤者為大引。二百斤者為小引。名曰改辦小引鹽。○二年定山東莊平。河間靈州。廣東海北。歲辦鹽課。每引四百斤。河東歲辦鹽課。每引二百斤。○二十三年定兩淮兩浙各

竈戶每丁歲辦小引鹽一十六引。每引重二百斤。共歲額七十萬五千一百八十引。復鹽工丁半之。其餘工丁四升。○二十六年定。凡天下辦鹽去處。每歲鹽課各有定額。年終各該運司并鹽課提舉司。將周歲辦過鹽課出給印信通關。具本入遞奏繳。戶部委官於

內府戶科領出。立案附卷作數。及查照繳到通關。內該辦鹽課。比對原額。有虧照數追理。○正統五年。令兩淮兩浙長蘆運司。每歲額辦鹽課。以十分為率。八分給與守支客商。二分另為收積。

在官候邊方急缺糧儲召中。以所積見鹽入。到  
即支謂之存積。其八分年終挨次給守支客商。  
謂之常股。凡中常股價輕。存積價重。○弘治二  
年。令各處歲報鹽課冊內務開寫某運司提舉  
司每歲額辦鹽課存積常股數目。該本色鹽若  
干。或布米等折貨若干。某場鹽課歲辦若干。辦  
完若干。每項各立行款開寫官攢某人總催某  
人。辦過鹽課。或布。或米。或貨。收入某字號倉囤。  
某年月日完足。出給某字號通關送繳。查算無  
差。各款後空立前件。長蘆山東河東運司於次

年三月終。兩淮兩浙運司於次年四月終。福建廣東雲南四川運司提舉司於次年六月終。差吏親齎奏繳。仍造青冊二本。一本送戶科註銷。一本送本部查考。若有過期并數目不清及虛出捏造者。查究問罪。○正德十三年。令各運司提舉司。但係海濱竈戶。應辦額鹽及應納因鹽。俱收本色給商。不許折收價銀。派及各商買補。違者聽巡鹽御史等官嚴加究治。凡工本鹽鈔。洪武十七年定。兩淮兩浙鹽工本鈔。每引二貫五百文。河間廣東海岱山東福建

四川每引俱二貫○二十八年令兩淮兩浙鹽  
運司煎鹽工本照各場額辦鹽數關鈔遣監生  
管運給散○宣德五年罷差監生於兩淮兩浙  
給散煎鹽工本鈔每歲照山東例於官庫內關  
給

凡餘鹽景泰元年令竈丁餘鹽毋引給米淮鹽  
八斗浙鹽六斗長蘆鹽四斗○正德五年令上  
中場分竈戶所煎鹽斤除鼓本場正課外多餘  
之數許缺鹽場分竈戶自相貿易○嘉靖元年  
議准各運司以後有私餘引鹽俱令本處召商

納價解部○三年奏准以後各窳丁除辦納正課外餘積之數聽責有引商人照例納銀解部赴各批驗所掣割○十五年議准今後商人到場若餘鹽缺煎時難收買許陳告查實止將正鹽秤掣不必抑勒取盈如勘窳餘鹽積多聽巡鹽御史區處或召有本商人收買隨同正引秤掣○二十一年題准今後開中引鹽只許正鹽掣掣其額外餘鹽盡行革去○又題准虜寇侵擾太倉銀積少支多各運司餘鹽照舊納銀解部以濟邊儲其兩淮價銀自本年為始量為輕

減。每二百斤。淮南定價五錢五分。淮北四錢。山東兩浙長蘆各照原定舊價收納。

凡開中。洪武二十六年定。凡客商與販鹽貨各照行鹽地方發賣。不許變亂。合用引目各運司申報戶部。委官關領。本部將來文立案。委官於內府印造。候畢日。將造完引目呈堂。關領回部。督匠編號。用印完備。明立文案。給付差來官收領。回還取領狀入卷備照。其各處有司。凡有軍民客商中賣官鹽賣畢。隨即將退引赴住買官司。依例繳納。有司類解各運司。運司按季通類解。

部本部塗抹不用。凡遇開中鹽糧務要量其彼處米價貴賤及道路遠近險易明白定奪則例立案具奏。出榜給發各司府州并淮浙等運司張掛召商中納○二十八年定開中納米則例出榜召商於缺糧倉分上納仍先編置勘合并底簿發各該布政司并都司衛分及收糧衙門收掌。如遇客商納糧完填寫所納糧并該支引鹽數目付客商齎赴各該運司及鹽課提舉司照數支鹽其底簿發各運司及鹽課提舉司收掌候中鹽客商納米完齊執勘合到比對硃墨

字號相同。照數行場支鹽。○又今以鹽糧勘合并鹽引印及鹽引銅板收貯。

內府戶科編號木記收貯戶部。遇該召商開中。本部奏請印刷編定給發各商。○永樂十七年。令各處客商原中不拘資次鹽引。遇到即支。○又令中鹽客商齎倉鈔赴運司。運司查原來印信比對明白。即與派場支鹽。○正統二年。令兩淮運司永樂年間客商該支引鹽。以十分為率。支與淮鹽四分。其六分免與山東運司支給。不願兌者聽令守支。○又令各該中鹽衛分造冊一

本具客商名數。復繳戶部。其鹽運司仍將該司額辦鹽數申報。每年終支過引鹽及客商姓名另具總數徑申本部註銷。○三年奏准召商納馬中鹽。每上等馬一匹。一百二十引。中等馬一匹。一百引。○今客商中納官鹽支給不敷者。兩淮運司雲南鹽課提舉司於河東陝西福建廣東各運司提舉司兌支。河間長蘆及河東陝西運司於廣東海北鹽課司兌支。○又今各邊召商中納鹽糧。淮浙筴中如以十分為率。淮鹽八分。浙鹽二分。或淮鹽七分。浙鹽三分。淮鹽止米

麥二色。浙鹽雜糧皆准。○又令各運司給客商引目。每引納中夾紙一張。至關領之時類解戶部倒引。○又令四川陝西雲南中鹽客商免納引紙。○五年。令年遠客商中鹽未支者。每引給資本鈔三十錠。願支者聽。○八年。奏准永樂洪熙宣德年間客商原中淮浙長蘆運司引鹽願兌支河東山東福建運司者。每一引支與二引。不願者聽其守支。○九年。令客商中鹽不許過三千引。其所納糧限半年內完足。不完者。扣日截出勘合。○十年。令客商年久不得支鹽。願

兌支者。知係原中地方。准量各場遠近。三七關支。非原中地方。一引兌與二引者。量地遠近。中半關支。○十四年。令中鹽客商。先將倉鈔齎赴戶部。送禮部鑄印局辨驗。前去運司支鹽。○景泰元年。令各處談上鹽糧倉。分置立內外字號。底簿二扇。用半印勘合。內號一扇。本倉收。外號一扇。申送運司。候各商齎倉鈔前來。比對印信。硃墨字號相同。仍查原投印信勘合。并印信。通文簿俱同。每於十二月。派場支給。造冊繳部查照。免商人赴部辨印。○又令各商中。到存積

官鹽人到即支。其常股鹽每年依期將見在商人挨次量高低場分派搭封驗引目赴場關支。備將商名貫址。勘合字號米鹽數目搭派場造冊繳部。年終仍將放過商名鹽數類總造冊送部查照。○又令收糧衙門類填勘合每道客商不得過二十名。年終通將商人糧斛鹽數并倉鈔勘合造冊送部查考。○二年令各商報中鹽數。遷延一年之上不報完者。即於常股鹽內派撥挨次關支。○四年令各運司提舉司客商引目支鹽出場。該場即為截角。仍具商名引數。

申繳總司收照○成化四年。令遼東各倉鹽引。許商人運米近倉之家囤放。告報管糧官親驗。是實取寄主鄰佑人等結狀。方許進倉。隨即督同官攢監收作數。年終巡撫官照例隔別委官查盤。若有虧弊。將經收人員通問均陪。完日許填給勘合繳部行場支鹽。不必折罰○十六年。令永樂宣德正統年間客商所中引鹽全未支者。各造冊送部。於原籍有司關給資本鈔。每引三十錠。景泰元年以後未支引鹽。願關資本鈔者。聽願守支兌換者。兩淮兌福建山東兩浙兌。

廣東俱每引加半引不願者聽照舊守支。十八年令各處開中鹽糧戶部行南京戶部編造勘合底簿之後仍行各運司等衙門查取客商姓名并原奉某號勘合於某年月日奉某例該支鹽若干開報該部查考其該衙門關領引目之日備開勘合字號客商姓名比對相同依數領給其客商領過耳目鹽斤各運司提舉司務開支過某年項下若干事故者開除候年終通類分豁舊管收除曾在數月造冊一樣三本一本送南京戶部查對一本送戶部一本送本處

巡鹽御史并風憲官處若有一應奸弊聽該部  
參究○十九年奏准正統十四年以前客商中  
鹽未支者准鹽每引給資本鈔三十錠兩浙廣  
東西川雲南每引二十五錠河東長蘆福建山  
東每引二十錠其景泰元年以後願開資本鈔  
者及今告代支故商引鹽者亦照此例○又今  
客商支鹽皆以上下場分三七分派常服存積  
正收正支如違商人治罪鹽貨入官官吏坐以  
枉法贓罪○又今各運司派撥商人下場單帖  
及引目俱送該管分司驗實印封倒文轉發該

場封收在官。聽令守支畢。將引截角。照鹽出場。  
○又令運司於客商齎到勘合連底簿俱送巡  
鹽御史處。比對相同掛號。明白方與派場。其運  
司關引之時。該部亦要查數明白。如法印封。給  
與領回。運司辨驗引真數足。另封收貯。逐起給  
散。若商人不到者。聽令再領。不許混同收放。新  
舊那移。及縱容通同盜賣。○又令各鹽運司提  
舉司徵解商人引紙。每一百張收銀三錢。委官  
運南京戶部轉發。應天府官庫。凡遇本部缺紙  
先期會計。行令該府拘集鋪行收買。送用。積有

餘銀准折官軍俸糧○弘治元年令上納引鹽客商病故無子。父母見在。兄弟同居同爨。不係別籍異財。妻能守志。不願適人。孫非乞養。過繼者。保勘明白。俱准代支。妻若改嫁。仍追還官。其伯叔姪姪。并在室出嫁之女。及遠族異爨之人。不許代支○又令支鹽客商。每鹽一引。勸借米一斗。或麥一斗五升。其無鹽自買。補者免勸借○二年令各鹽場該支客商。如有見鹽者。運司具查同引目手本。付客商齎至。巡鹽御史處告投。比對數目相同。親筆責限分司官支給。如過

期不與支給者問罪○三年奏准凡客商未支引鹽不分存沒已未到官但過三十五年者俱不准告關其流通底簿并勘合文簿盡行銷繳○十六年令已故商人遺下引鹽父母祖孫同居兄弟俱准兌支免其具奏止於巡鹽御史告行運司查勘支給○正德三年議准遼東二十五衛鹽場額設軍餘煎辦本衛官軍食鹽離衛寫遠難以運送自後免運給軍令加倍煎辦每年共鹽七百七十一萬二千八百六十斤該三萬八千五百六十四引每引定價銀二錢召商

糴買糧料。以備官軍月糧支用。○五年議准鹽課不許於腹裏地方中賣。亦不許奏開殘鹽。以逐商人奸計。待各邊奏有缺乏。戶部開送各邊報中。各色糧草。不許折納銀兩。○十年。令南京戶部印編鹽糧勘合。置立底簿二扇。內號一扇。送本部外號一扇。發運司各收掌。商人在邊納領勘合類繳本部。比號銷註。又每年置流通文簿一扇。計紙一百張。印鈐發運司。挨次附寫商人鹽數。以憑年終叫派。各開前件。派鹽下場記。派訖二字。支鹽出場記。支訖二字。隔年不支者。

改派別商。本部仍每年坐委員外郎主事一員。專管鹽法簿籍。計量鹽課高下。追理通關完欠。考究各邊虛實。斟酌開中多寡。比對勘合。查革奸弊。○十六年。令將鹽商貫址年貌事由。到司到場。出場秤掣日期。并經過住買地方。銷繳限期。刊板各留空處。如各府縣路引之式。隨處填註。以杜退引影射之弊。○嘉靖五年。議准。以後各邊開中引鹽。都遵照舊例。不許徑自奏討。及專乞淮鹽。○六年。議准。以後開中兩浙鹽課價銀。每引以六錢為例。不許任意增添。兩浙長蘆。

仍量搭配○八年議准。今後各邊開中。准浙等引鹽。俱要查照舊例。召商上納本色糧料草束。不許折納銀兩。其商人自出財力開耕邊地。納引鹽者聽○又議准遼東各衛鹽場煎辦。軍食鹽。果有額外餘鹽。盡行查出。召商收買。易穀上食。以備賑濟支用○十四年題准。以後開中引鹽。給與戶部印信文簿一扇。行令管糧郎中。無郎中處。所行巡撫都御史收掌。如遇商人報中。驗其實在糧銀若干。方與准行。隨將本商年貌籍貫。年納完糧草數目。明白登簿。給與勘

合實收一併照簿填寫事完將簿印封送部轉  
發巡鹽御史收候查驗若有詐冒嚴加根究干  
礙內外人員一併叅提從重治罪本部仍每年  
正月將派過各運司引鹽數目類行各該衙門  
先將在庫私鹽紙贖等銀照例每引三釐預解  
南京戶部造引領回候商人投到勘合即與給  
引派支所納紙價貯庫以備來年解造○又題  
准兩淮鹽斤每包五百五十斤內二百八十五  
斤連包索為正引原定六錢近減作五錢二百  
六十五斤為餘鹽淮南原定八錢今減作六錢

五分。淮北原定六錢，今減作五錢。兩浙每正鹽一引連包索二百五十斤，原定四錢，近減作三錢五分。餘鹽通融二百斤為一引。嘉興批驗所銀五錢，杭州批驗所四錢五分，紹興批驗所四錢。温州批驗所二錢。長蘆山東每包四百三十斤，內二百零五斤為正引，長蘆定價二錢。山東一錢五分。二百二十五斤連包索為餘鹽。長蘆南掣鹽所銀三錢，北掣鹽所三錢五分。山東三錢八分，今減作三錢一分。以上正鹽俱照舊。准浙上納本色糧草，長蘆山東折納價銀。遇有願

納本色者聽。餘鹽不必開邊。照舊運司納銀解部。轉發各邊。糴買客兵糧草。其甘肅險遠。止開淮浙二鹽。淮鹽再減價五分。每引銀四錢五分。浙鹽再減價五分。每引銀三錢。其餘各邊。如開淮鹽。搭長蘆。不必更搭。山東開浙鹽。搭山東。不必更搭。長蘆。以便掣支。正餘鹽斤數外。各商不許夾帶。違者。依時價。追入官問罪。○二十三年題准。今後各邊額鹽。并加添歲用。不敷存積鹽。俱於先一年秋。月開中。以便乘時糴買糧草。○二十七年題准。自二十八年為始。開中引鹽。無

論常股存積不分淮浙山東長蘆俱照原定價  
則止令上納本色糧草仍須申嚴法令不許勢  
豪占中經紀包攬并禁革額外勸借官攢常例  
使商人獲利樂從○二十九年題准河東引目  
舊板行鹽地方之下當增入南陽汝州字樣及  
歸德與潞安二州近改為府一體改正另行鑄  
造○四十年題准自今以後每正鹽一引之外  
許帶餘鹽一引正鹽在各邊報中上納糧草餘  
鹽在各運司查照題定則例徵銀解部永為遵  
守○隆慶二年題准南京工部各查照鑄造銅

版完日送南京戶科收貯刷印引目通行各該  
鹽運司提舉司分為四起限期兩淮限三月中  
兩浙限四月中長蘆限五月中河東福建廣東  
陝西四川雲南各為一起限八月終各依期差  
人赴南京戶部關領引目○萬曆六年題准南  
京戶部自萬曆二年以後鹽引勘合以二千引  
為一道照數刷完轉發各邊收掌如遇商人納  
完糧草即行填給

鹽引式

洪武初定

南京戶部見為鹽法事照到奏准各項事例

除欽遵外。本部合行開坐半印勘合引目。付客商收執。照鹽前去發賣施行。須至引者。

一兩淮運司。凡遇客商販賣鹽貨。每引二百斤為一引。給付半印引目。每引納官本米收入倉。隨即給引支鹽。

一各場竈丁人等。除正額鹽外。將煎到餘鹽夾帶出場。及私煎貨賣者。絞百夫長知情。故縱。或通同貨賣者。同罪。兩鄰知私煎鹽貨。不首告者。杖一百充軍。

一凡守禦官吏巡檢司巡獲私鹽。俱發有司。

歸問。犯人絞。有軍器者斬。鹽貨車船頭匹沒官。引領牙人及窩藏寄放者杖一百。發煙瘴地面充軍。挑擔馱載者杖一百。充軍。有能自首者免罪。常人捉獲者賞銀一十兩。仍須追究。是何場分竈戶所賣鹽貨。依律處斷。鹽運司拏獲私鹽。隨發有司追斷。不許擅問。有司通同作弊。脫放。與犯人同罪。

一起運官鹽。每引四百斤。帶耗鹽一十斤。為二袋。客鹽。每引二百斤。為一袋。經過批驗所。依數掣掣秤盤。但有夾帶私鹽。隨發有司追

斷客商貨賣官鹽自揚子江至湖南襄鄧俱  
係經過官司辨驗鹽引如無批驗掣摺印記  
者笞五十押回盤驗

一凡諸色軍民權豪勢要人等乘坐無引私  
鹽船隻不服盤驗者杖一百軍民俱發煙瘴  
地面充軍有官者依上斷罪罷職

一將官運鹽貨偷聚或將沙土插和抵換者  
計贓比常盜加一等如係客商鹽貨以常盜  
論客商將買到官鹽插和沙土貨賣者杖八

一凡客商興販鹽貨不許鹽引相離違者以私鹽追斷如賣鹽畢五日之內不行繳納退引者杖六十將舊引影射鹽貨同私鹽論罪偽造鹽引者處斬

一起運官鹽并場戶往來搬運上倉將帶軍器者并行處斬

一諸人買私鹽食用者減犯私鹽人罪一等因而販賣者處絞

一凡各處鹽運司運載官鹽許用官船轉運如竈戶鹽丁却用別船裝載即同私鹽科斷

凡掣割正統三年。令竈戶起運官鹽運司給牒  
總填數目用印鈐蓋。定限給付執照。各處批驗  
所。巡檢司照數掣掣盤驗。送納畢。在京於戶部  
在外於本衙門送繳。批發運司查銷。○景泰元  
年。令起運兩京官鹽。并客商發賣引鹽。南京於  
龍江批驗所掣掣。俱赴江東門。北京於張家灣  
批驗所掣掣。俱赴崇文門。開報兩京戶部。各委  
官看驗。批放入城。各門不許混放。○成化七年。  
今山東鄆城縣。每歲委官拜掣清洛場商鹽。○  
九年。令兩淮運司。凡盤復一應私鹽。并沒官掣

割等項商鹽俱運至儀真批驗所并本所掣割  
餘鹽通至二萬引以上開報。差官變賣給過○  
十一年。令長蘆運司。凡收割沒餘鹽積至一千  
斤以上。申報戶部變賣○十九年。令儀真淮安  
批驗所運鹽客商。不拘官軍民俱依法掣割。其  
割沒餘鹽除放支南京各衙門食鹽外。巡鹽御  
史按季督同運司掌印監掣等官變賣時價類  
解戶部○弘治二年。令各處秤掣引鹽。止許批  
驗所官。若本所無官。方委運司官。有司不許干  
預○正德二年。令四川萬縣等處抽掣鹽銀。自

本年為始。每年會算類解戶部。仍將一年收過銀數造冊送部查考。○五年。令以後商人支鹽出場。必待秤掣之後。量地遠近。定與水程。引隨所在官司賣過。即繳。不許過違一年之上。○九年。奏准。各運司遇割沒餘鹽。巡鹽御史督同運司。從公估費。或聽本商納價。年終類解太倉銀庫。以濟邊用。○十四年。令各運司今後割沒餘鹽。不拘多寡。俱令本商照依時估。納銀中賣。量加火耗。以資解人路費。若本商乘機夾帶。賄通官吏。不行盡數掣割者。船鹽沒官。官吏坐枉。

法贓罪。照例問遣。○嘉靖二年議准。以後兩淮  
運司割沒私餘鹽斤。淮南每引價一兩。淮北每  
引價八錢。俱存留變賣銀兩。解部接濟邊儲。○  
四年。令各運司掣割私餘等項鹽價。但積至一  
十萬兩。即便類解。年終將解過次數。申報戶部  
查考。不許那移侵欺。○十五年。令山東長蘆二  
運司。召商報中。先年割沒入官引鹽。及中支未  
盡殘鹽。定價有差。○二十一年題准。今後割沒  
餘鹽。許令變價解部。不拘本商別商。遇有見在  
鹽價。即與中納。如有勢豪占中者。聽巡按御史

叅奏重治○四十五年題准該掣鹽引每引五百五十斤外附帶餘鹽二十二斤淮南定價一錢一分淮北九分以補原割沒本銀無扣之數此外若多餘鹽照舊一分一斤割沒○又議准長蘆山東二運司商人報中引鹽正餘外有一包多重二十斤納銀一錢百斤以上依舊問徒沒鹽入官若於一包正數外夾帶重百餘斤積至二十包而重二千斤者照例發遣其有包數更多積算至二千斤者止照常例割沒問徒○隆慶二年議准商人割沒鹽斤免其重罰積算

至五百五十斤。今照近日擬定引價納銀。及該  
鹽關引起紙賑濟挑河等銀。就將運司收買官  
引。給與一道。以便照監發賣。若有分外多細大  
包者。每斤罰銀三分。所收銀兩與同餘鹽銀。一  
併解部。○六年題准。南京石灰山關。每年差事  
簡御史一員。專管掣驗。一年定以四掣。每仲月  
巡鹽御史委官稽船封引。督批驗所催船登冊。  
務限季月末旬。赴關聽掣。○萬曆四年題准。長  
蘆割沒鹽商人完納不前。每沒四十斤。定銀一  
錢。今本商自行上納。○又題准。兩淮巡鹽及南

道御史以後每季掣鹽以孟月二十日開價分  
賣仲月二十日封引季月二十日到關如期驗  
放若奸商觀望故違前期者不准續賣及到關  
違時者亦不准放○九年題准南京戶部添委  
王事一員每遇石灰山關鹽商到日與鹽政道  
御史齊詣公所眼同掣驗如御史不到主事不  
得行事主事不到御史不得開關其主事以四  
季為滿另委更替

凡鹽禁洪武二十七年令公候伯及文武四品  
以上官不得令家人奴僕行商中鹽侵奪民利

○宣德五年。今往來內官內使官軍人等夾帶私鹽者。許應捕官軍人等盤拏。○九年。今各處運司并鹽課司。但有客商夾帶私鹽者。原支引鹽俱沒入官。○十年。今各處總兵鎮守。及沿河捕盜錦衣衛官。監察御史。浙江等布政司直隸府州縣各巡按監察御史。及按察司官。俱設法緝捕私鹽。如巡檢司捉獲私鹽者。准作事蹟。若雖獲盜而不獲私鹽者。不准陞用。其各處軍官縱令家人興販者。家人問罪。正犯發本衛充軍。若所管旗軍餘丁興販者。該管官旗一體坐罪。

○正統元年。令各處有首獲私鹽者。鹽入官。以鈔照時值給賞。○三年。令販賣私鹽軍民人等。有能捕獲百斤以上。至二千斤以上。為止。每鹽一斤。賞鈔一貫。其近海近場窮軍貧民。有以肩挑易米者。不必具奏。徑自問結。○景泰元年。令各運司提舉司。及所屬鹽課司。原有山場灘蕩。供採柴薪者。不許諸人侵佔。○三年。奏准。淮浙山東長蘆運司。收到客商退引。按季類解。福建河東陝西運司。并四川雲南廣東靈州小鹽池等鹽課。提舉司。年終類解。俱開客商某。於某年。

月日支出官鹽若干發賣某行鹽地方及某月  
日繳到及已繳若干未繳若干其有沉匿在庫  
通同庫役人等轉賣影射私鹽者照私鹽榜例  
問罪○四年奏准凡詐冒代支引鹽者發邊衛  
充軍○七年奏准凡勢豪軍民人等聚眾與販  
私鹽者徑解兵部發鐵嶺衛充軍其巡捕巡司  
官兵人等受財故縱及令軍兵用強護送者罪  
亦如之○成化二年令軍民人等有駕使遮洋  
大船擺列軍器與販私鹽者邊衛充軍○三年  
奏准凡越境夾帶與販官私鹽至二千斤以上

者不拘軍民舍餘俱充軍。舍餘係腹裏者發邊  
衛係邊衛者發鐵嶺衛。其經過官司及四鄰里  
老俱照例問罪。○四年。令內外官員之家不許  
占中鹽引。其報中客商引數不許過多。并轉賣  
與人。及聽人包攬。如違在內從戶部并戶科叅  
奏。在外從巡撫巡按等官究治。○奏准馬快糧  
船夾帶私鹽二千斤以上者民發附近衛軍舍  
餘丁發邊衛。原係邊海衛者發遼東鐵嶺衛。各  
充軍。○五年奏准。販賣私鹽。但係駕使多槽快  
船。擺列軍器及聚至五隻以上者。不能見獲。許

根訪的確坐址姓名告官挨拏追取船隻軍器

入官俱照三年例問發○七年令兩淮鄉村竈

戶所在有司連家小發遣各場煎辦不許冒名

代替及賣放逃回○十三年令沿河軍衛有司

應該巡捕官兵止許緝捕本處地方私煎私販

及窩藏寄囤者不許拘留馬快運糧船隻擾軍

誤事其運糧并馬快回船照舊於臨清儀真二

處委官搜檢不許仍前乘機偷搶盤纏食米等

項違者拏問○奏准內外官員凡坐馬快船隻

如有夾帶私鹽不分有無知情俱照例問罪各

糧船夾帶私鹽該管指揮千戶等官問罪減半  
給俸○十七年奏准西安府人民不許與販靈  
州鹽課○十八年令巡捕官員與販私鹽至二  
千斤以上發邊衛充軍○十九年令客商典當  
引目與人名為夥支或典賣有勢之人名為賣  
支及以假引賣與商人冒頂真引并以舊引轉  
質與人影射私鹽者俱問罪引目鹽貨入官○  
又令客商偽造印引謊名貨賣者梟首示衆又  
住鹽場接置害人者遞發原籍當差○又令客  
商派定場分守支完即打引出場若無見鹽者

止許於本場買補。若將已完鹽課捏作未完遺留空引。侵盜影射私鹽者。鹽貨價錢並入官官吏縱容。以枉法論。○二十一年。奏准各運司提舉司鹽課。但有奏討許戶部并科道官糾舉治罪。○弘治元年。令各處軍衛舍餘典販私鹽。該管官通同縱容者。問罪革去。見任。○二年。令兩淮運司於各鹽場。每總催一名。出通關一紙。編立內外號簿。用印鈐蓋。責付分司發各場。如遇總催名下。并該管鹽課納完。分司官查算歸併倉口。別無虧欠。方照名填繳。仍委官覆盤。不許

指倉指圍通同捏作虧折。如違該場分司總司  
官吏總催委官俱發邊遠充軍。戶部該司仍立  
該年鹽課文卷一宗。已完未完按季照刷。戶科  
立上下半年註銷添銷之法。查考各運司提舉  
司。以每歲辦完鹽課實數。年終造冊奏繳。即差  
吏赴戶科註銷。○又令各商給領引目。自出司  
到場之日為始。中多者不過一十五年。中少者  
不過十年。俱依期支盡。起離本場。若故意遷延  
過違年限。倚住害人者。依律問罪。仍照占中賣  
窩事例發落。未盡鹽引沒官。其勢豪窳尸發賣

私鹽及勒指該支客商者私賣之數盡追入官  
該支之數立限給商仍各治以重罪○又奏准  
各處商人齋倉鈔赴運司告投派場闕支該場  
不許阻滯違者治罪○八年奏准客商軍舍人  
等敢有貨賣私鹽及於

親王之國收買私鹽買求跟隨軍舍人等夾帶及  
軍舍人等私自買者保人并牙保依律例發落  
鹽入官干礙本府輔導官員一體參問若各該  
地方官員縱容越過者聽戶部參究連坐○今  
兩浙運司竈戶若事故例當新僉者止許府縣

查補照例納銀。酒丁事故方許運司勾充。俱各  
明立簿籍查考。其場官催日人等敢有將銀課  
改作鹽課窳戶捏作酒丁。一槩朦朧勾擾者。俱  
問以枉法贓罪。○十三年奏准。客商收買餘鹽  
買求掣掣至二十斤以上者。照私鹽例發遣。經  
過官司縱放。及地方火甲里老知而不舉。各治  
以罪。巡捕官員乘機與販至二十斤以上。亦照  
前例問發。其豪強鹽徒聚眾撐駕大船張掛旗  
號。擅用兵仗響器者。巡捕巡鹽官兵尋訪擒捕。  
若拒敵殺傷人命者。俱梟首示眾。各處鹽場無

藉之徒號稱長布衫趕船虛光棍好漢等項名  
色把持官府詐害客商犯該徒罪以上及再犯  
杖罪以下俱發邊衛充軍凡偽造鹽引印信賄  
屬運司吏書人等將已故并遠年商人名籍中  
鹽來歷填寫在引轉賣誑騙財物為首者依律  
處斬外其為從并經紀牙行店戶運司吏書一  
應知情人等但計贓滿貫者不拘曾否支鹽出  
場俱發邊衛充軍○令各

王府不許奏討食鹽其織造官有奏討引鹽越境  
貨賣者聽戶部并戶科論奏治罪○又令逃竄

窩隱豪民之家。三箇月不出。豪民發充竈丁。竈戶問罪鄰佑不舉。所司占愆不發。一體治罪。○十四年議准。今後商人關支引鹽務照舊例。每引二百斤。掣出斤重有餘。即將商人依律問罪發遣。○令兩淮行鹽地方有司。凡遇商人運到引鹽。即拘告報數目。賣畢追收退引。按季繳送運司。聽巡鹽御史年終通查具奏。如有不繳。至五千引之上者。該府州縣官聽本部叅奏問罪。○十六年奏准。織造段疋。再不許奏討鹽價。違者許該部該科論奏。○令兩淮運司。今後各場

鹽課。先要辨驗。竈丁日逐納鹽。若有泥土。不許收受。係官吏總催。押和抵數。那補間發附近衛分充軍。分管官不行用心辨驗者。事發一體治罪。○十七年議准鹽場。先將該年正課納完。剩有鹽斤。方許各商買補。正課未完。就將鹽斤先買裝出者。竈商一體治罪。額辦鹽課。除年例供應各項食鹽。關支外。其餘務要如法收積。聽候各邊商人關支。但有勢豪之家。仍前奏討買補。侵奪商利。阻壞鹽法者。奏詞立案。仍聽戶部及科道官論奏。治以重罪。○十八年

詔各該巡鹽巡按御史從實查理內外勢要奏討  
奏買各項鹽斤未支掣者俱各住支還官今後  
行鹽各照地方不許越境販賣○正德二年令  
四川雲南鹽井遇有商人支鹽過期不與支者  
提該管官吏人等問罪若竈戶勒指該商將餘  
鹽貨賣事發即同私鹽盡數入官犯人依律究  
治總催枷號一箇月發落○三年令都察院出  
榜曉諭長蘆直抵儀真各該巡鹽分巡官嚴督  
官攢禁革奸弊清查額課果有侵欺那借虧折  
等弊照數追陪有私販并夾帶者追沒入官官

民船隻經過者管洪管閘官員隨路盤驗。交通故縱者一體治罪。○五年令江西湖廣三司掌印官同各守巡等官巡捕私鹽。每月結報巡鹽御史。○奏准商人支鹽出場不許堆積日久坐待高價。三月以上不行發賣者商人牙行店戶問罪。半年以上者鹽引沒官。○議准廣東沿海軍民蛋戶賴私煎鹽斤為生。許令盡數報官。於附近場分減半納課。以補無徵之數。鹽課提舉司給與批文執照。有不報官貨賣私鹽者充軍。○又令以後商人領引出司。自到場之日為始。

有見鹽者。一百引以下。俱限一箇月。一百引以上。至五百引。俱限兩箇月。六百引以上。至一千引。俱限三箇月。一千引以上。至五千引。俱限四箇月。五千引以上。至一萬引。俱限六箇月。若無見鹽。有例許客商備本買補。及竈戶名下追支者。俱照前引數限期。五千引以下。通再寬限一箇月。五千引以上。再寬限兩箇月。俱令出場。若違限者。查治。自出場為始。俱各照依原定水程。運至各批驗所。候掣過發運。定撥賣鹽處所。俱照舊定水程。不許違限。至各處住賣。三百引以

下俱限兩箇月。三百引以上。至一千引。俱限三箇月。一千引以上。至三千引。俱限四箇月。三千引以上。至五千引。俱限五箇月。五千引以上。至七千引。俱限六箇月。八千引以上。至一萬引。俱限十箇月。中間有路途不便者。限外一月不繳。免究。○十一年奏准。進貢馬快船隻。不許在長蘆收買私鹽興販。○十二年議准。一應商人。并勢要人等。俱不許違例奏討風雨消折等項。殘鹽阻壞鹽法。有誤邊儲。○奏准。福建起解軍器及各進貢。雇到民船。夾帶私鹽。至二千斤以上。

者。比照馬快船附搭客貨私物事例。俱發口外  
為民。或邊遠充軍。○令長蘆等運司各照每歲  
額鹽若干。除戶口織造并各項奏討若干外。見  
在若干。務於本司遞年季報循環簿內開報本  
部。遇有邊警照數開中。盡數乃止。以後敢有通  
同任情更改。以次年分營求上等鹽場及透派  
下年紊亂成法者。經該官吏俱問擬枉法贓罪。  
商人從重問擬。鹽貨住支。引日入官。○十六年  
詔巡鹽御史并各運司官查訪鹽糧勘合內坐到  
已支未掣并未派未支鹽課。但係商人投託勢

要說名占中。賣窩買窩。及河東運司鹽課例。該  
宣府中納。被勢要奏討賣窩。別處開中。并奏開  
殘鹽減價報中者。悉照大明律。裁革入官。不許  
放掣派支。○嘉靖元年。令總鎮等官。不許縱容  
下人倚勢販鹽。侵奪民利。阻壞軍餉。○四年。令  
商人原中靈州大小池鹽課。照原該行鹽地方  
發賣。不許攬越境界。山西河南陝西各府州縣  
衛所。將河東行鹽地方。翻刊大字告示。張掛曉  
諭。但遇客商將官鹽越境貨賣。及奸人與販本  
地自煎私鹽。查照律例。從重問發。○五年。議准。

開中各運司引鹽不許透派以誤緊急邊餉。如有奸商人等故違律例不待守臣會奏戶部議開仍前寅緣報中者許科道糾劾本部叅送法司治以變亂成法重罪○六年令巡鹽巡江御史督令各該巡鹽巡捕官司將濱海濱江鹽徒挨拏盡絕仍根究官鹽不通私鹽盛行之弊應自處者徑自處置事體重大者具奏定奪若鹽徒勢重原設巡鹽巡捕人役不敷巡撫巡江都御史酌量緩急調兵擒捕毋令滋蔓○又今在外各衛及守禦千戶所巡獲私鹽俱即時連人

贓衛則關堂所則解送附近州縣收問。贓物變  
賣價銀。類解運司轉解戶部。敢有違限半年之  
上。不即關衛及送有司者。不拘有無入已。即照  
巡獲私鹽不解官者律坐罪。有能告首。就將所  
獲私鹽贓物充賞。○議准。今後巡監御史委官  
掣割餘鹽。不必務足先年積銀百萬餘兩之數。  
其商人赴場支鹽。比照原引量買。勤竈餘鹽。打  
包過所秤掣。敢有務為貪得。打包至不可秤掣  
者。查照私鹽事例。連正額引鹽俱令沒官。干礙  
勢要。聽御史指實。叅奏治罪。○奏准。各運司節

年開剩殘鹽風雨消折有名無實奸商投託勢  
要奏討減價中支任場買補不候挨單者聽該  
科參出徑送法司枷號示衆○八年令商人買  
鹽添包各于本場收買勤竈納剩官鹽不許別  
場買補違者商人問以私販私煎徒罪若至二  
千斤以上者引例充軍鹽貨入官○十年奏准  
長蘆運司差人解納供用庫內官監光祿寺等  
鹽斤不許無藉歇家兜攬裝運權勢店內抽包  
盜賣○十八年題准張家灣客商運到鹽斤聽  
其從便堆卸不許權豪勢要之家及牙行人等

邀截停勒。如違聽巡按御史拏問重治。○又題  
准。今後緝事衙門旗校。敢有遠出數百里外。生  
事擾害阻壞鹽法者。聽巡鹽御史參奏治罪。○  
二十一年議准。開中引鹽。如有權豪勢要之  
投書囑託。及積年無籍之徒。占窩賣窩等項作  
弊者。各該官員。即便拏問治罪。應參奏者。徑自  
參奏。其巡撫都御史。管糧郎中。聽受囑託。及徇  
私作弊者。悉聽各該巡按御史參究。○二十六  
年題准。長蘆運司。遵進年例鹽斤到京。不許軍  
民勢豪人等。開店囤住。及歇家抽取店錢。指稱

打點其供用庫等衙門止照原派數目速為收  
受不許刁難勒捐違者監收科道巡鹽巡城御  
史叅拏東廠毋容緝事人役嚇詐解官竈丁違  
者許戶科訪實糾奏○又題准河東運司報中  
鹽課除邊儲八萬兩外但有贏餘俱解布政司  
通融處補拖欠祿糧。

宗室不得陳乞自行撈掣阻壞鹽法○二十七年  
題准山西巡鹽御史遇鹽花生結務要儘力撈  
辦如法苫蓋以後放支之時如千引中銷折不  
及百引者將該年攢典問罪待生鹽年分責令

撈補其百引以上者俱於經收官攢及看秤斗  
名下照例追陪不許撈補○二十九年題准該  
司將行鹽地方府分備查各屬州縣里分歲用  
食鹽若干明白開申巡鹽衙門照數批行運司  
將一應掣過官鹽挨次闌撥填給水程行令各  
商前往行鹽地方發賣仍選殷實人戶充當鋪  
行照依時估交易若有商人過違限期不到者  
許所在官司照例問罪仍置循環簿印發按季  
將賣過退引鹽數申繳倒換敢有仍前與販私  
鹽者照例問罪發遣○隆慶元年題准官吏食

鹽各衙門自行差人。公給脚價。赴場關支。即委  
運司首領官催僱起發。至小直沽批驗所。另委  
府官會同秤掣。如有夾帶。與商人一體割沒。問  
罪。至二千斤以上者。照例發遣。○議准。

御馬尚膳二監。取喫馬涼鹽。及魚蛤等鹽。令該管  
人役。于見賣商鹽買用。不許下場易買。敢有仍  
前指稱者。聽所在官司拏究。勢衆者。鄰近州縣  
約會擒捕。其各處進貢進鮮糧運。并沿河射利  
之家。窩藏夾帶者。許各巡捕官兵設法搜邏。依  
律重治。事干權豪。聽巡鹽御史參究。○又題准。

商人有囤積引目影射者。清查盡數入官。犯者從重究治。中納商人領引。方許親自下場。當官驗引。照數買鹽。如無見鹽。官立文書。錄交竈戶。依時算值。嚴限交完。即將引目截角。不許多買。沒官引目。即行燒燬。不許告買。以滋多弊。其奸商通同催秤。以貨物舉放。貧竈私債。准折虧害者。嚴行禁革。場官通同總催。科索常例。擾害竈戶者。即時拏究。問黜。○又議准福山狼山二港。為鹽徒往來門戶。責成總兵官。督令把總等官。用心防禦。有任其縱橫出沒者。一併叅究。○又

議准行北直隸山東河南各州縣地方嚴禁私煎貨賣。如地本鹹。油不生。五穀責令依額納鹽。發官商領賣。給與印信小票。令其肩挑背負貨賣。不許攬越別境。○又題准。

御馬監歲用。咬馬涼鹽。移文本監知會。毋得差人下場收買夾帶。長蘆運司查照來文內鹽引。每年先期處辦。候差人支領。○六年題准。行各省鹽法道。專管驗引稽檢事宜。一切囤積夾帶私賣之弊。嚴行禁治。○萬曆十年題准。各省直凡遇商人運到引鹽。掌印官驗。今原編牙銷。照依

時值貨賈不許仍前分派里甲。大戶馬頭鄉長  
致害小民。其緝獲私鹽秤驗上庫。開報運司撥  
商支掣。如有消折量減斤數。毋致鋪戶陪累。○  
又題准江南鹽徒越境興販。行令應天浙江巡  
撫并操江都御史。于各該叅遊守把等官俱給  
與批劄。不妨原務。兼捕鹽盜。各照信地巡緝。不  
許畏縮推諉。○十二年議准湖廣荊州府屬人  
民買食川鹽及潛住歸夷地方與販私鹽。嚴行  
禁革。不許仍前販賣起稅。

凡優處鹽丁。洪武二十七年令優免鹽丁雜泛。

差役○又令兩浙兩淮竈戶有犯笞杖斷決徒  
流遷徙雜犯死罪者止杖一百仍發煎鹽其事  
故竈丁勘實以附近有田糧丁力相應人戶撥  
補○宣德二年令各處竈戶免雜泛差役○十  
年令竈戶犯該徒罪有力者准納米贖罪○正  
統二年令各處竈丁有犯俱免納米及調場笞  
杖者的決雜犯死罪與徒流罪者除歲辦額鹽  
外令每日煎鹽三斤死罪准工五年流罪准工  
四年徒五等各照年限計日煎鹽贖罪○又令  
兩淮兩浙貧難竈丁除原額鹽課照舊收納其

有餘鹽者不許私賣俱收貯本場運司造冊發  
附近州縣每一小引官給米麥二斗○四年令  
兩淮貧難竈丁戶下該徵稅糧於本州縣存收  
免令遠運○六年令兩淮兩浙勸借支鹽客商  
米麥收積該場賑給貧難竈丁其該支引鹽仍  
挨次放支○十二年奏准河東運司鹽丁除正  
役里甲該辦糧草外其餘壯夫弓兵皂隸一應  
雜泛差役丁少者俱蠲免丁多者亦量減除○  
十六年奏准竈丁逃亡事故者運司官公用有  
司僉補其竈丁拖欠鹽課并鹽價者運司并分

司官催徵拖欠稅糧者。府縣官催徵各不相干。預○弘治二年。令各處鹽場總催竈丁。有犯三年五年徒罪。并加役等項。每日令煎鹽三斤。通計若干。折作引鹽。每一小引。追銀二錢。類總解京○又令各處竈戶犯徒罪以上。審有力。并干礙鹽法囚犯杖徒以上。該納米贖罪者。俱發所在倉場照罪上納米穀。及入官船隻頭畜貨物。亦變賣價銀。送發該場。以備凶年賑濟貧竈○又令竈戶除全課二十丁三十丁以上。通戶優免。若般實竈戶。止當竈丁數名。亦止照見當丁

數貼竈。此外多餘丁田俱發有司官差其餘該課鹽丁亦照原議丁田津貼免其差徭夫馬若奸民詭寄田糧及豪強竈戶全家影占差徭者就將多餘丁田照數收補逃故竈丁詭寄不多者依律問罪田糧改正○七年奏准竈戶死絕充軍者即以本場新增出幼空閒人丁撥補如無方許於附近民戶僉補○十六年奏准准揚二府各場竈丁有欠稅糧者止許催促不許拘拏監追犯罪者行運司提問亦不許徑自拘擾戶內該解軍役另僉相應人丁管解不許將見

辦鹽課竈丁。一槩僉解。○議准。巡鹽御史每三年一次。查審各場竈丁。其正丁。就將餘丁幫貼。不拘戶籍同異。務使均平。○十八年議准。辦納鹽課竈丁。一丁至三丁者。每丁免田七十畝。四丁至六丁者。每丁免田六十畝。七丁至十丁者。每丁免田五十畝。十一丁至十五丁者。每丁免田四十畝。十六丁至十九丁者。每丁免田三十畝。二三十丁者。全戶優免。中間該免之外。若有多餘田畝。方許派差。如有將田准丁辦鹽者。一體照數除免。其有丁無田者。不許他人將田請。

寄戶下影射差役違者問罪照例充竈○正德元年奏准各該巡鹽御史清查竈丁原給灘蕩見在者給與領業逃亡者給增出空丁或投充人役頂補原課○六年議准以後竈戶犯罪在撫按衙門覺發者除人命強盜重情外其餘一應輕罪俱行巡鹽御史問罪不許動輒勾擾附近州縣人民如藏匿竈丁侵占草場運司行文提問而有司坐視者有罪人犯聽巡鹽御史查提問擬州縣官吏一體參究○八年奏准兩淮鹽場水災泮死竈丁遺下鹽課暫准分豁候有

復業出幼人丁頂補。湔消在倉鹽課。照例免陪。遇有商人該支之數。查照年分。均勻搭配。免納賑濟銀米。許其自買勤窰餘鹽補數。被患窰丁賑濟量給器具。起蓋窰房。○十一年議。長蘆運司窰戶。照依有司上中下戶。則例編審造冊。除上中戶丁多力壯者。量將二二丁幫貼辦鹽。此外多餘人力。照舊編當別項差役。下戶者。止令營辦鹽課一切夫役。民快邊餉馬價軍器等雜差。俱與優免。○又令長蘆運司。每五年一次。選委能幹佐貳官一員。親詣有場分州縣會同。

各掌印官。將槩場人戶照依均徭則例逐一編審。丁力相應者為上戶。獨當總催一名。次者兩戶。朋當一名。貧下者聽其著竈。○十五年。令各府州縣。因徠情罪深重者。不論遠近。俱發本省鹽場。缺人鍋下。照依年分煎鹽。抵辦逃亡竈丁課額。○嘉靖元年。令長蘆海灘附近竈民。修濬灘地。攤曬鹽畝者。每年以十分為率。止取三分。補納逃亡額數。如遇風雨不結。年分即為減免。○九年。令運司將一應無礙官錢及上司本司贓罰等項。悉糴米收貯。以備鹽丁賑濟。○十一

年。令山東永利等場有堪以耕種地段。許各竈丁開墾。收取花利。備辦鹽課。○又令兩淮巡鹽御史嚴督分司官。招撫逃移竈丁。○十三年題准。今後有司。但有竈戶告理歸民。務要查冊審實。申呈撫按詳允。不許擅自更張。○十五年

詔各處鹽場有因雨水損壞倉廩。消化鹽課。曾經撫按官奏報勘實者。並免追陪。○十八年。令查通泰淮三分司所屬鹽場掣過餘鹽銀五萬兩。賑濟被災場分竈丁。極貧無妻者。每丁給銀三兩。使自娶。死亡者。召募僉補。若有人民犯私鹽。

徒罪以上者。補充竈丁。諸項差課暫為寬貸。○  
二十四年議准。優免竈丁。除原額大小外。止以  
實徵小丁納銀之數為主。如六錢至七錢者。照  
舊三丁折算原額一大丁。免田一百畝。四錢至  
五錢者。四丁折算原額一大丁。二錢至三錢者  
五丁折算原額一大丁。其餘一錢。必朋足一兩  
八錢之數。方准算原額一大丁。俱免田一百畝。  
各縣編僉之時。先行各場備查原額大丁鹽銀  
若干。見在實徵小丁若干。某戶見有幾丁。每丁  
實辦銀若干。本戶有田若干。應免若干。仍吊黃

竈二冊查對明白。照數優免。此外多餘田地。照例與民一體科差。仍止出銀津貼。不許力差煩擾。○二十七年議准。兩浙運司石滙場新漲沙地。除通洩鹽水。并原係辦鹽採薪地畝。照舊起科。分撥除豁外。其上中二則。實該陞科田五萬一百六十三畝三分二毫。俱自二十六年為始。每畝科糧五升五合。折銀三分。共該銀一千五百四兩八錢九分九釐六絲。內係軍民匠戶得業者。行餘姚縣隨糧帶徵。係竈戶得業者。行該場隨課帶徵。通解運司貯庫。遇有竈戶逃移復

業及年時荒歉量支賑恤○隆慶元年題准清查竈丁影射行督撫及行各鎮軍衛衙門以後選充軍人務要互相保結果係空閒民丁方許投充若係竈戶即行追回所給軍裝押還該場問罪若朦朧保結者一體連坐運司官員亦要設法招徠加意安撫使其守土樂業

凡差官清理永樂十三年差御史給事中內官各一員於各處開支鹽課○十四年差監察御史一員巡視河間運司私鹽○宣德十年差監察御史一員於兩淮通州狼山鎮守提督軍衛

巡捕私鹽○正統元年。差侍郎及監察御史。巡視長蘆等處私鹽○三年。令取回兩淮兩浙長蘆整理鹽法內外官及御史等官○又令兩淮兩浙長蘆等運司每歲各差御史一員巡視及催督鹽課○十一年。令長蘆巡鹽御史。兼理山東鹽法○景泰元年。差侍郎二員。清理兩淮兩浙鹽法○二年。取回兩浙巡鹽御史。令鎮守侍郎兼理鹽法○三年。令巡河御史兼理兩淮鹽法。裁省巡鹽御史○又令差監察御史二員於兩淮兩浙巡鹽○七年。令廣西按察司各道分

巡官兼催督各該鹽課司鹽課○又令四川按察司各道分巡官兼督鹽課○天順四年令山西按察司分巡該道官兼巡視河東鹽池○成化四年差都御史一員清理兩淮鹽法○令兩淮各場每遇年終選差有司官查盤鹽課每三年巡鹽御史親詣各場查盤○九年差監察御史一員於河東運司巡鹽○十七年令雲南布政司提督銀場參議兼理鹽法○二十三年令陝西慶陽府每歲委佐貳官一員監支靈州鹽課司商人納馬官鹽及民間食鹽皆以次相兼

給放○弘治元年差侍郎二員兼僉都御史清  
理兩淮兩浙鹽法○二年令福建清軍御史兼  
理鹽法仍照兩淮等處巡鹽御史例年終具奏  
催辦過鹽課○六年添設廣東按察司僉事一  
員專理鹽法○十三年差都御史一員清理兩  
淮鹽法○正德二年令浙江水利僉事往來蘇  
松嘉興等處地方提督巡鹽○三年差科道官  
各一員查盤兩淮運司革支商人引鹽變賣銀  
兩解京又添差科道官清查各運司在庫并未  
賣引目○十年令陝西巡茶御史兼理西漳二

縣鹽課闕給引目勘合設法開中○十四年令  
廣東巡按御史帶管鹽法○又令福建巡海副  
使照舊帶管鹽法○又令山東守巡兵備官統  
理山東六府并徐宿二州鹽法大名兵備官統  
理順天等北四府及彰德衛輝二府鹽法○嘉  
靖八年令雲南巡撫都御史於布政司叅政叅  
議官員內定委一員專管鹽法○九年令延綏  
西路及寧夏管糧僉事分管靈州大小二池○  
十五年令固原兵備副使稽察批驗所奸弊○  
十六年差都御史一員清理鹽法○隆慶二年

差都御史三員。經理各處屯鹽。○六年題准。各  
運司判官責令駐劄信地。專徵鹽課。一切解銀  
齎捧。並不許差委。

凡鹽場官吏禁約。正統元年奏准。各鹽運鹽課  
司。及各場官吏考滿考退等項。到部者。俱送戶  
部發回。住俸責限催辦。未完鹽課。其應考滿未  
起程者。免赴京。亦住俸催辦。完日奏請定奪。○  
景泰元年。令各鹽場大使守支九年。應考滿者  
原經收已派商鹽年久不至。准給與後至客商  
其餘不盡之數。交盤見任官攢。依例給由。○又

令運司同知副使判官等官各定分司催督鹽課。不得更易互管。仍按季具數總司查併遇有考滿。止開該催分司鹽數稽考。及有事故等項。但許附近分司帶管。不得轉委。○二年。令各處歲辦鹽課。經管官員務依時督催煎辦。按季開報合于上司。年終出給總足通關奏繳。如有拖欠。該九年考滿住俸催完。方准給由。○又令各運司提舉司官吏。縱容庫役門子。那移作弊。及分司官員鹽課司官攢通同富豪總催鑊秤人等。詐害客商。批驗所監掣官員并官攢作弊害

人受贓滿貫者俱發邊衛充軍○成化十六年  
令各處鹽課次年正月不完者該場官住俸杖  
追分司并運司官以十分為率三分不完者一  
體住俸其各官三年六年考滿巡鹽御史查勘  
任內鹽課完足方許起送若九年考滿所屬鹽  
課過違限期不完者查送吏部降二級敘用官  
攬丁憂事故等項從巡鹽御史委官查盤經手  
鹽課交付接管官攬方許離任○弘治元年令  
各處鹽場官仍舊九年考滿○二年令巡鹽御  
史查考各處該年鹽課其有延至次年六月終

不完者於本衙門遞降一級。運使六年不完者一體施行。○又令各巡鹽御史清查各運司提舉司鹽場官。自成化元年以後未經考退者不分在任改任。但於任內有報足通關而虧欠鹽課一千引之上者俱作素行不謹。一萬引者俱作貪官。分司三年之內所屬場分各年有報完虧欠者亦作不謹。六年亦作貪官。俱行吏部定奪。其攢典不分見役去役俱發為民。○又令冬鹽場官攢如遇分司官吏到場及相識官員經過科派總催頭目出辦銀貨答應者計賦彼此

俱罪。其稱拜見銷牌解冊者俱問擬入已贓。若書算皂隸吏典人等卡場求索者仍坐親管官。鈐束不嚴罪。各該運司每場置立循環簿二扇。責見役總催每月附寫使用數目於上。月終齎送運司遞換書寫。巡鹽御史不時查究。○八年令各運司運使及分司官任內鹽課拖欠者不許赴部考滿。及別陞官職。○十二年令各運司官考滿務開任內各年分已辦過正課若干。補課若干。如正課已完補課未完者亦不許申送。給由。○十三年令兩淮鹽課自本年為始。逐年

完辦不完分司場官革去冠帶住俸。至次年六月不完。并將運使革去冠帶住俸。○正德二年。今雲南四川鹽井官吏各井鹽課務。要逐年完納。一年不完者革去冠帶住俸。三年俱不完者本衙門遞降一級。吏革役為民。受財作弊者以枉法從重論。俱責成布按二司管鹽官員比較查理。○嘉靖二年。今各該鹽運分司場官。今後不許擅收折色。違者聽巡鹽御史問以不職罷黜。引鹽改正。

大明會典卷之三十四